



COMUNU DE CUARTU S. ALENI

Progetu finantziau cun su dinai de sa Regione Autònoma de Sardigna cunformas a sa L. 482/99 e a sa L.R. 22/2018.

ANCA EST SU CUNVENTU DE IS PARAS S'INCARRERAT SA DE SETI BIENNALI D'ARTI NOMENADA 'TEMPO ED ETERNITÀ'

Sighint in Quartu is fainas culturalis cun sa punna de amanniai sa socialidadi e incarrerai sa tzitadinàntzia conca a unu benidori prus profetosu. Is ùrtimus dèxi diis de donniasanti at a essi s'arti a bessiri a pillu, cun sa **VII Biennale d'Arte e Letteratura**. Apustis de s'atòbiu de Tatars, sa rassinnia culturali lompit in tzitadi, cun unu focus apitzus de is argumentus cun tìtulu: *Tempo ed Eternità - Ombre e luci nella memoria dell'umanità*. Quartu dd'acabat a essi làcana chi artisticamenti aunit e accolit, non pighendi in consideru is strobis e is variedades territorialis.

S'amostadura, amparada da su Comune de Quartu S. Aleni e ghiada da s'Assòtziu Lumen, previdit is òberas de gaias 49 artistas, chi mancai cun stilis artìsticus diversus, imprassant impari su sentidu de sa Biennali, aundi sa memòria lompit a essi dimensioni spirituali chi castiat a s'Eternidadi. Su tretu torrat a partiri da sa stòria e dda traballat in un'arti chi bessit aina de unioni intre passau e presenti; un'intensidadi chi s'amànniat in consideru de su momentu stòricu de criticidadi manna chi seus bivendi e chi mirat a incarrerai sa chistioni de s'òmini cun is arrèxinis culturalis e cosa sua e torrai a ponni in pei s'identidadi insoru.

Su caminu artìsticu – literàriu allargat is campus de s'esperèntzia e spertat incora de prus sa connoscèntzia intra e intre is personas. Invitu a pensai apitzus de su disisperu de su tempus nostru e a donai boxi a s'esistèntzia de s'òmini de oi, fendi bessiri a pillu s'abisòngiu de sa beridadi. S'esperèntzia depit trasmiti sa sabiesa de su Tempus, biu cumenti a balori antropològicu e religiosu chi non si consumat. Unu contai chi est un'arrellògiu chentza de acùgias, cun punna a marcai su caminu de sa memòria, in manera de non perdi umbras e luxis de sa stòria de s'umanidadi.

Sa rassinnia artìstica, intre líneas tundas, struncadas e geomètricas, formas e sinnius chi arremonant su passau e arregordant su mitu, s'at a tenni da su 19 a su 26 de donniasanti a s'ex **Cunventu de is Paras de bia Brigata Sassari**, chi incora una borta bessit logu de accollimentu e chistionadas interculturalis.

Cenàbara 19, da oras de is 16.00 a oras de is 20.00, est in programa sa presentada de sa VII Biennale cun una litura dereta de is òberas, a sa presència de is artistas amostadoris. Su merì at a essi a incuru de sa Presidenti de s'Assòtziu Lumen **dot.ssa Eugenia Cervello**; at a pigai parti una rapresentàntzia de sa Giunta Milia.

